

**Date – 26/12/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Odhisa larsap atana ruat thar Mizoram larsap ni mek Dr Hari Babu Kambhampati chuan a chawlh hun pawt tawi-in naktukah Aizawl a lo lut dawn.**
- 2. Tun hnaia council of ministers thukhawm chuan Mizoram sorkara department 6 chu 3-ah a sawi khawm.**
- 3. Vawiin hian President Droupadi Murmu-i chuan kawng hrang hranga naupang hlawhtlingte hnenah ‘Pradhan Mantri Rashtriya Bal Puraskar’ chawimawina a hlan dawn.**
- 4. Khawvel hmun hrang hrangah Krismas lawm a ni.**

<><><>

**GOVERNOR**

**Odhisa larsap atana President Droupadi Murmu-i’n a ruat thar Mizoram larsap ni mek Dr Hari Babu Kambhampati chuan a chawlh hun pawt tawi-in naktuk hian Aizawl a lo lut dawn.**

**Aizawl Raj Bhavan atanga Akashvani Aizawl-in thu a dawn danin larsap hi Inrinni-a Agartala a NEC Plenary session hmanga a kal kha lo let leh tawh lovin an khaw lamah Krismas leh kum thar chawlh hmang turin a tlang a. Kum thar zawha lo haw chauh tura a inruahman lai-in sawn a nih tak avangin a chawlh hun pawt tawi-in Zirtawpni hian a lo kir leh dawn a. A chhan engmah a sawi lo na-in a pawn thua telin Odhisa larsap hna zawm turin a kal dawn niin an ngai. Odhisa larsap bang ta Raghubar Das thlaktu tur a nih avanga hmanhmawh taka insingsa tura lokir hma ni a rin a ni.**

**Hetih lai hian Mizoram larsap atana ruat thar General Vijay Kumar Singh-a’n a hna a rawn chelh tan hun tur chu official-a an la hriat rih loh thu Raj Bhavan atanga thudawn chuan a sawi a ni.**

<><><>

**CHRISTMAS-FIREWORKS**

**Kum engemaw zah hnu-ah Aizawl khawpui-ah halpuah leh halmawi tel lovin Krismas urlawk zan hman a ni.**

**Kumin Krismas urlawk zan, Thawhlejni zan kha Krismas hla lar tak ang mai-in 'Zan thiang reh' hun hman a ni a, buaina lian tham a awm hriat a ni lo. Sorkarin khauh taka halpuah, halmawi leh a behbawm a khap chuan rah tha chhuahin urlawk zan muanawm leh boruak thianglim tak a ni a. Home**

minister Pu K. Sapdanga chuan mipui hnenah lawmthu a sawi tih Akashvani Aizawl a hrilh. Pu K. Sapdanga chuan kum hlui thlah zan chu a huphurhawm zawk tih pawmin Kumhlui thlah zan atan hian Aizawl khawpui tuam turin Police team 13 an insiam thu a sawi a. Sr. SP/AIGP te'n he'ng Police team te hi an ho ang a, YMA/JAC/ VDP te an veng theuhah an duty bawk ang a, drone eng emaw zat chung lamah an duty bawk dawn niin a sawi.

Christmas urlawk zan khan Home Minister Pu K. Sapdanga hian Christmas boruak muanawm tak neih a nih theihna atana Aizawl khawpui chhunga Police duty-te bakah YMA leh VDP Duty post-te a tlawh kual.

Home Minister chuan Christmas urlawk zana boruak muan awm tak chu mipuite thuawih rah leh duty-te inpekna a nih thu sawiin, Mizoram sorkar thuchhuah halpuah leh puak thei thil dang khap chu December ni 31, kumhlui thlah zan thlenga khauh taka kenkawh a pawimawh thu a sawi a, Home Minister hi Mizoram Police hotute bakah Central YMA Kumpulan Committee hruaitute, Akashvani Correspondent leh chanchinbumi thenkkhat te'n an tawiawm a ni.

Hetih lai hian Reiek khua a Pu Ramchangliana te chungkuain kumtina an tih danin nizan khan an khaw naupang a duh duh tan Urlawk zan pualin thleng an dawh tir leh a. Nizan khan naupang 192-in thleng an dawh a ni.

Catholic kohhran chuan urlawk zan khan 'mass thianghlim' Lalpa Zanriah Sakramen hun an hmang a, nimin lamah an buatsaih bawk.

Krismas Ni chu Aizawl khawpui leh a chheh velah chuan Pathianni angin biak-in tinah Krismas puala Pathian biak leh chawimawina inkhawmna hun atan hun hman a ni a. Krismas ni chawhma Pathian biak inkhawmah Presbyterian Kohhran chuan Synod atanga thupui thlan, "Lal thar a piang, mi fng ten Chibai an buk" tih an ngaithla a, thu chhiar inchhawn (Responsive Reading) an nei bawk. Kohhran tam ber chuan waviinah Krismas ruai an theh dawn a, nimin lama theh tawh pawh an awm ni a thudawn a ni.

Urlawk Zan chu boruak muanawm tak hnuaiah Serchhip District chhung khaw hrang hrangah mipui ten hlim taka hmangin, boruak duhawm lo thleng a awm lo a. Khawpui chhûng branch YMA ten kumtina an tih thin angin duty post an siam a. Duty post hi Dist thuneitute, Sub Hqrs leh Excise enforcement ten a hran theuha tlawhin thingpui lumna atân pawisa leh hmanruate an pe a ni.

Champhai district ah pawh mipuite'n buaina leh harsatna lian tham awm lovin Krismas hun an hmuak thleng a, Champhai District a Police station leh Out Post hrang hrang, Champhai, Dungtlang, Farkawn leh Hnahlan ah te boruak a muanawmin Lock up te a ruak vek a ni. Kohhran tam zawkin waviinah naupiang lawmna ruai an kil hlawm ang.

Kolasib District chhunga khaw hrang hrangah urlawk zan ah leh nimina Krismas lawmna-ah boruak a ralmuang a, Kolasib District chhunga Police station leh Outpost hrang hrangah te pawh thil duhawm lo thleng hriat tur a awm lova man pawh an awm lo. Halpuah hal leh a kaihhnawih thila inhnawih pawh man an nei lo.

Khawzawl District-ah pawh boruak muanawm tak hnuai-ah Krismas lawm a ni a. Buaina leh harsatna lian tham a awm lova, District Police Station-ah dan bawhchhiatna lam hawi thubu-ah a awm lo a, boruak a ralmuang hle. Chawngtlai khuaah chuan Uralwk ni khan Eco-Tourism Concert buatsaih a ni a, Khawzawl District chhung leh pawn atangin zaithiam tak takte an zai a ni.

Lawngtlai district-ah chuan urlawk zanah khawi hmun atang mahin thil duhawm lo thleng hriattur a awm lova, boruak tha lo thleng thei vengin Police leh Young Lai Association te an duty a, zan rei tak thlengin veng hrang hrang ah Krismas zaikhawm thawm hriattur a awm. Vawiiin hian Kohhran tam zawk chuan ruapui thehin Krismas lawmna hi neih chhonzawm an tum.

Krismas ni chu Mamitah chuan Pathian ni anga hman a ni a, Mamit a Kohhran hrang hrang chuan inkhawmna hun hman a nih bakah urlawk zan inkhawm ban atangin Kohhran mite an zaikhawm a ni. Kohhran hrang hrangte chuan chawhma inkhawm banah thingpui ruai buatsaihin Kohhran thenkhat chuan Zo chhangban an hmeh. Kohhran tam ber chuan vawiiinah krismas ruai an theh anga, nimin lama ruaitheh tawh thenkhatte pawhin vawiiin hian an nawn ang.

<><><>

MISSING BEAR

Thla 8 chuang zet Aizawl sahan atanga chhuak a bo tawh, savawm chu nimin tuk khan man a ni leh ta.

Deputy Conservator of Forests (Wildlife) Pi Margaret Lalramchhani hnen atanga Akashvani Aizawl thudawn danin sahan bula savawm manna atana thang an kam bul lawkah Thawhlethni tuk zing lam dar 3 leh minute 24 khan an thlalakna (camera) kam chuan savawm thla hi a la fuh a. Nimin tuk khan a chaw chah a thir bawm thang an kam hmangin man a ni ta a ni. Pi Margaret Lalramchhani chuan savawm an man leh thei chu an lawm tak zet tih sawiin Krismas thilpek hlu taka an ngaih thu a sawi a ni.

Lungverh hmuna Aizawl sahanah hian savawm 2 a awm a. Kumin May ni 30 a Cyclone Remal-in Mizoram a nuai khan savawm dahna hmuna thing tlu kar chuan a hungna tichhia-in thing chung a lawnin a tlan-chhuak ni a hriat a ni a. A hlim chhawnah phei chuan chawlhkar 2 thelh tlawh phal lohin sahan khar hial a ni a. Hmun hrang hrangah vak kualin hmuh a ni a, engemaw hun lai phei kha chuan tute'n emaw an that tawh a nih an ring rum rum hman a. Hetiang a nih hnu hian sahanah bawk kir lehin an man leh thei ta a ni.

<><><>

CYMA

Central YMA Vice President leh Kumpuan Chairman ni baw, Professor Lalnunluanga chuan YMA chu ram thatna tura roreltute hmalakna tawiawm a, tanpui a an kaihza vengtu an nih thin thu a sawi.

Akashvani Aizawl correspondent nen an inkawmnaah Professor Lalnunluanga chuan Mizoram sorkarin Christmas leh kumthar vuakvet a halpuah leh puak thei thil dang a khap chu a hlawhtlin ngei theih na'n YMA chuan ke a pen mek thu a sawi a. Hemi chungchangah hian Central YMA

chuan sub headquarters, group leh branch tinah te pawh mipuite hmena lehkha an tihchhuah thu a sawi. Kum dangah pawh YMA member-ten theihtawp chhuah a tan an thin avangin Zoram mipuiten Christmas leh kumthar hun hlim leh thlamuang taka an hman thin thu a sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnun dar 2 leh a chanve-ah Chanchinthar puan leh a ni ang.

<><><>

AMALGAMATION

Tun hnai a council of ministers thukhawm chuan Mizoram sorkara department 6 chu 3-ah a sawi khawm.

Council of ministers thutlukna siam dan chuan Information & Public Relations Department leh Printing & Stationery hi chhunfin niin, a hming atan Information, Public Relations, Printing & Stationery (IPR&PS) vuah a ni dawn a. Local Administration Department (LAD) hi Rural Development (RD) nen kaikawpin, a hmingah Rural Development & Administration Department tih a ni ang. Tribal Affairs department pawh Art & Culture Department nen department pakhata chhunfin a ni ang a, a hmingah Tribal Affairs & Culture Department tih a ni ang. Hei bakah hian Zoram Medical College (ZMC) a thawktu chi hnih - sawrkar hnuai a thawk leh society hnuai a thawkte chu sawrkar hnuai a thawka dahluh vek turin council of ministers chuan thutlukna a siam bawk a ni.

Council of ministers thukhawm chuan mau hi forest area pawna mi chu Horticulture department chan tawh turin a dah a. Mau lak hnu a sawngbawl hna a intan atangin Commerce & Industries in a chang thung ang. Thingpui hi Horticulture department hnuai atangin Commerce & Industries ah pek a ni bawk.

Mizoram Private Placement Agencies (Regulation) Act, 2015 chu council of ministers hian paih a rem a, a aiah hian Mizoram Private Placement Agencies (Regulation) Bill, 2024 siam tur chu pawm a ni a. Mizoram pawna hnathawk tur thawn chhuah theihna dan ding lai hi a that tawh loh avangin mi tam takin harsatna an tawh niin sorkar chuan a ngai a. Chief Minister Office-ah ram pawna awmte buaipuitu turin 'Diaspora Cell' hial din a ni a. Tha tak leh tluang taka India ram chung leh ram pawna hnathawktu inthawn chhuah a nih theih na'n he dan thar duan hi assembly inkhawma putluh tur a ni.

<><><>

PRESIDENT MURMU TO CONFER 'PRADHAN MANTRI RASHTRIYA BAL PURASKAR' ON 17 CHILDREN FROM 14 STATES/UTS IN NEW DELHI

Vawiin hian President Droupadi Murmu-i chuan kawng hrang hrang chi 7-a hlawhtlinna chang naupang 17 hnenah 'Pradhan Mantri Rashtriya Bal Puraskar' chawimawina New Delhi-ah a hlan dawn.

Heng naupangte hi state leh UT 14 atanga thlan chhuah an ni a. Sawrkarin naupang hlawhtling chawimawina Bal Puraskar a hlan turte chu kawng hrang hrang - art and culture lam, naupang huaisen, chin chhuah thar nei, science thiamna lama hlawhtling, vantlang tana thawk tha, infiam mi leh chhehvel enkawl kawnga mihlawhtlingte an ni. Chawimawina dawngtute chuan medal, certificate leh thuziak bute te an dawng dawn a ni.

New Delhi Bharat Mandapam-a India hmathlir naupangte chawimawina hunah hian Prime Minister Narendra Modi-a pawh a tel dawn a. Ei tur leh a tih-that lehzualna tur scheme 'Suposhit Gram Panchayat Abhiyan' a khuhhawng dawn a ni.

<><><>

#### CHRISTMAS CELEBRATIONS

Khawvel hmun hrang hrangah Krismas lawm a ni a. Nimin khan Vatican City-a St. Peter's Basilica chuan thlawhtu a ngah hle a, zing atang khan a luhka Holy Door an tihah chuan mipui an intlar put a ni.

Pope Francis chuan 2025 Holy Year a hawng a, Catholic Church lawmna tur a hawng bawk a. Hetah hian Rome thlawh tur sakhaw biakzin maktaduai 32 vel an kal beisei a ni.

Australia-ah chuan kiltin kil tang atangin mipuite chu vaukamah te, huanmawi-ah leh mual zawlahte Krismas lawmin an fuankhawm a. Queensland khawthlang lamah chuan Mas putar kaihhawiha intihhlimna leh intihsiahte buatsaih a ni.

Nepal-ah chuan Kristianten urhsun takin Krismas an lawm a. Nepal-a Biakin lian ber, Assumption Church an tih, Lalitpur district-a Bhanimandal-ah chuan Kristiante fuankhawmin an tawngtai rual a ni.

<><><>